

吳
興
藝
文
補

吳興藝文補序

吳興為江左清樂之國六代名
賢至從人主上章請郡風流政
蹟焜耀湖山而文事亦日以富
有當時宦游其地者類能編纂

故實如吳興郡疏出晉太守王
韶之手入東紀出梁主簿吳筠
手雜錄地紀出唐刺史張文規
顏真卿手統記出宋長史左文
質手豈自公之暇偏於此地獨

多抑學優之長獨於數公偏授
也後世刑名錢穀之累較煩吏
其土者數朱搔墨且至弗遑寢
洩於是冊府之權旁落不收而
寓公逸客起而操之猶幸沿此

一脉使山泉雲蘇不埋沒於荒榛亂礫之中者舊衣冠猶生動於遺碑斷簡之內所關一郡文獻不啻重也余每讀雲間徐伯臣先生掌故集見其援引該博

采摭精嚴而於藝文一錄猶若
草創未備者幸近日閱覽之士
如董遐周閔康侯韓聖開韓仲
弓諸君合志同方廣蒐博證自
正史以及稗官自家乘以及雜

部或人非湖產而故實相關或
文寓它題而觚藻泛掞皆亟為
表襮列之序皇自唐季以前董
君為政宋元而後閔韓共蒞斯
盟幾窮科斗之藏併茹玄釋之

味誠武庫偉觀也惜哉伯臣不
作遐周早逝余乃得以公事之
隙樂觀其成遙視晉唐諸公不
任編纂而任流通勞佚之數相
去奚翅什伯哉余獨思顏魯公

在羃日既為地紀鏤之石柱又
以餘力繕成韻海鏡源一書至
於徧招材彥叅與子姪方外白
足皆得揮麈入席唐季政衰兵
戈洊起乃有此一片洞天福地

任吏隱者逍遙如此豈必遇
嵩少然後白日生羽翰哉
古今吏道苦樂不相及若
是因序藝文為三嘆云

崇禎六年秋九月吳興郡守陳

以誠書

吳興藝文補小序

吾里遐周董君有異才爲江右
陳赤石先生所賞將闖天門而
病病中以著述當藥餌泛者爲
廣博物志精者爲吳興備考而

補藝文尤詳吾郡故有志志中
之文絕稀蓋嘉靖中推一大賢
爲主羣手競湊成之直其名耳
卽掌故一書亦出寓公之手豈
我湖饒山水而獨罕人物耶余

家居久慨然慕東沙之于寧陽
和之於紹而自分孤陋未能任
遐周以後起獨承之余老未得
全覽先閱藝文之目大約臚夏
周之鍾鼎亦不廢近代之綺羅

收山海之珍奇亦不遺家園之
薑芥斯亦典籍中之一快也嘗
與閔康侯氏相叅訂沒旣久康
侯念寶玦沉淵菁毫埋土將使
海若山靈笑人取而梓之謀諸

韓聖開氏仲弓氏復哀廣而加
詳焉緣繡谷陳郡尊意問序于
余私念陳言戛去止自文字言
耳至總覽家則吳星隴月玉海
金樓正取其廣不厭其多如積

穀然新者旣少陳者亦匱新陳
相因此太倉之貯而三家村必
不能辦也遐周青年便能到此
當是用修後身良友又能張之
粲然盛行我湖之華白而玄珠

卽其中矣

崇禎壬申清和月同里七十六

翁朱國禎拜撰

吳興藝文補序

藝文者郡邑志之一斑也吳興
藝文補者又藝文之一斑也吾
友遐周康侯皆具良史才何
不取全志而任之曰難言也閩中

新都其官史而不任史也北
地瑯琊其人史而復不任史也
於是中原之菽多變為稗周
行之轍蜀轅於野也稗也託
於史而史以亡則反不若都邑

之簿山水之經不駕史名而史之
軀以具然而武功之簡也有病其
促者隨州之弘也有摘其迂者甚
至青州雍紀之卓犖駭肆也有
猶為祿者不獨任史難即任志

亦難也又不特此也索米取金之
事蓄以此懲小人而今且以疑君
子天刑人禍之懼者以此歲鑒鑒
而今且以惕草萊又何怪乎文
雖熄而簪筆者之勞不爲袖手

者之逸耶。然則藝文遂當疏
行乎。曰。奚而孤也。文之為體。與
而曜。竝揭而其為用。與萬彙相
鮮。揆識既具。正矧自符人代。
宰從斯而緯其鉅者。核典故。

宣政理列材數驗興方而其纖
者之鼓吹宮商極命草木使藝
文而不脩則是黼裳珮玉可以免
冠授几張筵及罷設醴亦何以陳
雅會而禱羣心也吾鄉自赤烏

樹城以及石馬浮疆代作畿屏
封提騷苑歷來冬虎簪彤之
老浮家泊宅之倫咸挾賦以登
高能义手而依韻縹緗之業藻
繪蒸霞裒集之難晨星伴

月九靈山長乃以完規富士留心
掌收華跡英叢雖其衆輯
爲拘於方紂脫或清於類焉以
錢通迷海斤鑿堙山始事勤
劬可忘裡祝遐周授華公族

泮鏡園襟以仲遠駁竅之精
魚茂先綜覽之富隨其獵弋
即寓鋤莠不局一隅不執一見凡
事關若雲若雞跖必集私腹必
收六韜以爲前砦金三擲二棄而

下法範並資筆削之功閱唐而
止傷哉玉樓已趣名矣康侯
整音徽折未沫聲竹素折重
翻探討加恢鑒裁加密勒歲里
之部三生鄴架之輝譬徐氏之

取哉則梁父先禪若西君之合
志則百谷歸王不聽弁峴之靈
獲以父事抗衡雍齊諸紀若因
而有任修郡乘者亦千百禩考
訂之林也集成謀之郡侯陳公

公治郡不減額以蘓又牧以徵父
覈獻網羅舊聞為事意者
茲編得託以不朽乎余獨嘆
康侯及子猶子曰今此世界
真有大富銀錢可分尚方筆

札可賜漫郎教叟猶倚漁蓑
牧笛而傲之史固不可任也嘗
見成老舊志用脩先生所輯
藝文部至四十餘卷後人以其
繁冗盡汰之志之不可任如此

今欲使冊府長存筆塚不壞
但還藝文本邑不妨孤行於
國史郡乘之外然後流傳較
永此固兩君著錄名補不名志
之意也亦即當日掌故成書稱

錄不稱志之意也然而非釋
也非野也真有志於史與志
者殆終莫能外也

崇禎壬申嘉平舊史氏韓
敬撰

吳興藝文補紀事

嘗攷史之繁重而難悉者莫大於諸志而諸志之中才有難兼博於星曆者未必通於方輿博于氏族職官者未必通於禮樂刑法錢賦藝文諸體故志爲史之一體而藝文又爲志之一目自後世司府州縣各志其輿圖沿革秩官選舉以及田賦武備人物祥異之類而通名曰志於是志若具史之全體而志之傳始重自非良史才不能勝其任而有才者又不欲勝其任此吾友遐周氏所以托于藝文一補以自見也遐周嘗謂予昔騶衍

作迂怪之談列中國名山大川廣谷禽獸水土所殖物類所珍因而推之及海外人所不睹謂中國於天下八十一分之一耳當時王公大人竒其言而尊事之今吾郡於中國亦若八十一分之一安所從事於域外之觀以附不朽乎予應之曰莊子有言去國數日見其所知而喜去國旬月見所嘗見於國中者而喜豈非以類之聚者聲氣所感固有不能自外者耶詩云維桑與梓必恭敬只士苟有能則古昔稱先王卽不越鄉閭而兼三才羅千古亦旣秩然燦然矣且吾郡鍾英毓秀代不乏

人卽掛瓢而趨與襜褕戾止者咸極人倫之雋徵文考
獻幾於寓內無兩安所見八十一分之一者之足以陋
吾識隘吾觀乎抑聞之虞雍公鄉里前輩文獻無傳後
生之責予孽斯旨未嘗不惘然自失子倘有意亦何必
效談天之衍以自炫也遐周乃喟然曰子命我矣但其
困二豎者十餘年時見藥鑪醫案之傍冊鉛不輒莫窺
其志之所屬及一旦應召玉樓始從廢簾中簡得其所
爲文若詩者曰靜嘯齋集其所爲襍論紀述者曰吹景
集其有係于湖之山川風俗人物政事者曰吳興備考

曰吳興藝文補而又於其中別方外之乘爲白法志靜
嘯吹景二集已爲點定行世白法及備志則其嗣君猶
未忍輕出手澤而菽文一書顧屬未竟之緒予乃不揣
蕪陋與閔康侯家聖開共卒業焉書成而吾師繡谷陳
公適來守郡先是予遊秣陵受知于少司空何薜莪師
於時陳師方爲司空曹郎亦謬於較士中模索得予遂
相與爲文字知而薜莪師皇明文徵之選予曾與薜對
之役師因以搜討之業相屬始敢以是書進不虞吾師
之拊掌擊節也呼而語之曰撰述之家其流各別史通

所謂偏記小錄逸事瑣言家史別傳茲不具論他若周
稱之陳留耆舊周裴之汝南先賢陳壽之益郡耆舊虞
預之會稽典錄謂之郡書若盛洪之荊州記常璩華陽
國志辛氏三秦羅含湘中謂之地理若漢有三輔黃圖
隋有東都記於南則宋南徐州記晉宮闕名於北則洛
陽伽藍記鄴都故事謂之都邑簿彼皆各紀其本國之
風物以俟後之好古者有所稽討故雖偏而不廢襍而
有徵今吾于是集讀施延曆議姚信昕天論諸篇而博
於星曆讀沈懷遠南越志裴清進金沙泉表諸篇而博

於方輿讀唐宋以來碑傳墓銘諸篇而博于氏族讀沈懷文省錄尚書議及後代授贈制誥諸篇而博于職官讀吳商禋祀六宗議陳高祖南郊告天文及沈不害上陳高祖置學書姚察定雅樂奏諸篇而博于禮樂讀陳文帝春夏停刑詔沈洙測囚議徐堅請決獄覆奏疏諸篇而博于刑法讀始興王濬武康開漕疏沈慶之鑄錢議顧憲之西陵增稅議陳文帝減賦詔陳宣帝墾田蠲稅詔諸篇而博于錢賦讀沈約上宋書表評詩序陸厥與沈約問聲韻書王績與陳叔達借隋紀書釋清晝詩

式序諸篇而博于藝文是從來諸志中所難兼者讀是集悉能兼之寧僅作吳興一郡觀已耶子其亟圖之予拜命而出授之剗剗氏凡二十有二月而工竣予乃端策以告吾師曰小子不敏竊嘗聞班固易司馬遷八書爲十志而江淹以爲修史之難無出于志者鄭樵亦云志者憲章之所係必老於典故然後能爲今郡國志其名沿於固而其義例實備諸史志可嘗試漫爲哉志又可廢閣不講哉師領之曰唯唯則又端策以告吾師曰師之所以留意於是集乃師之所以爲政者耳今有司

苦簿書期會刑名錢穀日不暇給或視志爲迂濶事不復省記或有增益改作令胥史簡舊牘錄以塞白而已且今之爲政者簿書期會刑名錢穀寄聽胥史之口第能簡舊牘不甚垂鑒如前所云是亦爲政矣孰有好謀能聽以徵文考獻爲當官急務孜孜討論如吾師者乎吾師之爲政清靜寧一一切務與民休息而懸魚瘞鹿之操祈自信不求人知三年中吏畏民懷恩覃化治復得以退食之餘披圖閱史夫亦曰鑒古之遺如指諸掌布在方策貽諸後人其志之謂乎志未之逮也而姑

以藝文存焉此吾師命梓之肯故曰師所以留意是集
卽師之所以爲政者耳於是師乃莞爾笑曰子且歸而
識之爰命墨卿述其緣起如此 崑

景禎六年癸酉冬日西吳韓昌箕仲弓甫識

刻吳興藝文補感言

先君子侘傺名場浮沉菰園江錦割而不盡宛轉匡床
孫金擲尚多聲婆娑小室於是閉門則吳解組之蹈澹
海而開卷斯同著書之歸茂陵雖斷簡殘編空食神仙
之字然髯枯頭責難磨筆硯之靈顧尤注意於粉榆謂
必取徵於文獻乃勤漁獵爰補菰文積有歲年成茲卷
帙傷哉鄧林之木已枯誰爲翹楚龍門之桐旣死孰賞
知音幸遇魯公葺玄真之泛宅欣逢張永賓麟士於織
簾遂使千年朽蠹頓生籤軸之光半世雕蟲不負卅鉛

之志是先君子以作者之才爲述者之事而予小子以
生者之悲爲死者之幸矣惟我

牧伯宗主斯文帳設絳紗進受經之廬植亭藏玄草容
間字之侯芭而尤加意遺編登之剞劂倉曹人物之志
盡歸網羅征南武庫之儲舉彰琬琰使先君而在豈勝
唏附之榮俾小子聞之彌動音徽之痛敬題末簡聊識
感私云爾若松之佐陳壽之史義例倍森仲宜受蔡邕
之書編摩無恙幸諸父黨不負深盟奕世戴之片言曷
罄矣

不肖孤輩說泣血稽顙謹識

吳興藝文補總目

文

漢晉文 第一卷

宋文 第二卷

齊梁文 第三卷第四卷

陳隋文 第五卷至第七卷

唐文 第八卷至第十二卷

宋文 第十三卷至第二十四卷

元文 第二十五卷至第二十八卷

皇明文 第二十九卷至第四十卷

賦

漢至皇明賦 第四十一卷

詩

六朝詩 第四十二卷

唐詩 第四十三卷至第四十六卷

宋詩 第四十七卷至第五十二卷

元詩 第五十三卷至第五十四卷

皇明詩 第五十五卷至第六十一卷

詩餘

唐至皇明詩餘 第六十二卷第六十三卷

附錄

朱平涵文 第六十四卷

董遐周文 第六十五卷

董遐周詩 第六十六卷

補遺

歷代詩文 第六十七卷

吳興藝文補卷之一目錄

漢

趙明誠金石錄

祝長嚴祈碑

嚴祈烏程長

卜胤

堂邑令費鳳碑文

費鳳烏程人故鄣宰

石勳

費鳳別碑文

費玓

玓之孫

梁相費汎碑文

費汎烏程人
鳳之父

施延

沛國蘄人
寓烏程

曆議

吳

孫皓

初封烏程侯

分吳興丹陽爲吳郡詔

賜孟仁姚信手詔

朱然

故鄣人

上孫權征柁中疏

朱績

然之子

與奮威將軍諸葛融書

吾粲

烏程人

召謝譚爲功曹教

姚信

武康人

易解

請旌張白妻陸氏表

誠子書

士緯

听天論

陳壽

徐詳傳評

徐詳烏程人

晉

陸機

薦賀循表

賀循武康令

郭璞

浮玉山鯢魚讚

大浮玉山在
孝豐縣

謝安

郡守

與支遁書

吳商

安吉人

異姓爲後議

禋祀六宗議

沈充

武康人

驚賦序

王羲之

郡守

吳興三帖

吳興鮑帖

藝文補

卷之一

目次

三

源書帖

王獻之

郡守

吳興帖

王胡之

郡守

薦沈勁疏

沈勁武康人
充之子

鈕滔母孫瓊

鈕滔吳興人

公孫夫人贊

與虞定夫人薦瓊夫人書

答虞吳國書

與從弟孝徵書

王恭

與沈警書

沈警武康人

聞人爽

吳興人博平令

論會稽王道子疏

沈寂

武康人懷文之祖

東海王後議

支曇諦

烏程人

燈讚

丘道護

烏程人郡守

道士支曇諦諫

并序

王韶之

郡守

舉潘綜吳達孝廉教

潘吳俱烏程人

陶回

郡守

請賑疏

吳興藝文補卷之一目錄

終

吳興藝文補卷之一

烏程董斯張遐周彙編

閔元衢康侯叅輯

韓千秋聖開增定

漢

祝長嚴訢碑

不著撰
人名

趙明誠金石錄

祝長嚴訢碑政和中下邳縣民耕田得之碑云惟漢中
興卯金休烈和平元年歲治東宮星屬角房月建朱鳥
中呂之均萬物慈射華澤青葱蛟行蠕動咸守厥常人
物同授獨遭灾霜顛實徂落壽不寬弘經設三命君獲

其央年六十九又云伊歎嚴君諱訢字少通兆自楚莊
祖考相承招命道術治嚴氏春秋馮君章句又云幼爲
郡掾史會稽諸暨尉烏程毘陵餘暨章安山陰長以病
去官後爲丹陽陵陽丞守春穀長舉孝廉遷東牟侯相
下邳祝長典牧十城所在若神其後有銘銘爲五言頗
殘闕難讀云

堂邑令費鳳碑文

卜 胤

惟熹平六年歲格亏大沆無射之月堂邑令費君寢疾
卒嗚呼哀哉於是夫人元弟故

關三字

守卜胤追而誄之

其辭曰君體履柔餘溫其如玉修孝友乎閭閻執忠蹇

於王室立迹州郡仕更右職舉直措枉彊齋關貸貢孝

三署勛譽有則出宰近甸民懷厥德色斯輕翔翻然高

絜王人述職分關班爵台關招烈鼎調物遐已進第

不營榮祿栖遲歷稔項領滯畜彰土不庭黔民作卣命

君關政化關行從善遷恩三暮君致道有耻且恪

散守旌功轉在堂邑垂拱不言而民帥伏三時之間卒

以關洽旻天不吊命也早歿春秋六十六棊儀瘁傷泣

涕連漉豈愛我躬命不可贖臨終迷關內發祖業良

田畝一一金推予弟息辭位讓財行義高節卓不可及

名實相副有始有卒

關二

人善憲弓切惻

故吏故鄣

施業字世堅義民堂邑佾忠忠奉十有一慈考早隕喪

以備於禮制蓬首而

關三

壞而消辟地

關三

行毋氏以

關四

而悼傷服

關

菲區區繚杖其未除廣陵之郡守東

關二

聞寢疾而終卒凡百普悲

關四

備化比屋之餘

關

棺柩車哀以而逆之祖載已畢訖還返其故鄉

關

其節操悲其有

關二

每以

關五

其左親忠

關

君厚

德念君之仁恩聞君之隕隧剝斷而丰酸復截繚麻杖

君之樞棺扶號而竭關 泣涕其關 甫於岐山關

其從之迷君而到官上書而度關 君盡禽息之關 君

之關 三關 君關 三關 於山關 列種嘉奇樹特爲之潤鮮

忠業與關 猶君恩使然雖君有大化孰能爾者難子

喪之終關 思其顏而關 死可贖不愛關 人今君關

於彼卓譎而超倫吏民慕高蹤來者其如雨偉名建勝

石垂示於關 門下功曹徐侃字元節主簿呂嘉字元

主史陳信字聖舉主記史關 忠字建臺門下游激關

字叔騰門下賊曹關 字聖臺門下史曹助字仲臺

關
吏呂常字孝讓從椽位徐超字元貴

淇适隸釋云右漢故堂邑令費君之碑篆額今在湖州費君名鳳自郎中嘗宰新平故鄣堂邑三縣以靈帝熹平六年卒其妻之弟卜君追誄之乃作此碑碑中無名字云之石君詩碑云祖業良田畝享一金推予弟息此固可嘉至於退已進弟不營榮祿則又人
之所難其云行義高邵卓不可及名實相副有始有卒信哉此云黎儀瘁傷孔宙碑亦云乃綏三縣黎儀以康黎則黎老之稱儀則讀如旌倪之倪也誄之後

載施業戚忠二人竭力送終之事業者鄆土之故吏
忠者堂邑之義民皆費君之舊部也其辭皆五言石
磨滅文不相屬初敘戚忠早喪慈考母服未除有廣
陵之役聞計來奔祖載還鄉及梟隧有期復截經杖
扶號棺棺列種奇木建立磐石此其大畧也非五五
者居喪菲食二十五月也岐山者其地名其後有門
下功曹題名者九人

張按此碑已載掌故第缺故吏
故鄆以下三百餘字故備錄之

并錄
燕頤

費鳳別碑文

石 勳

君甥家中孫甘陵石勛字子才載馳載驅來奔丐喪庭
階確意悲感切傷心瞻彼碑誄懷之好音司馬慕蘭相
南容復白佳仰之以彌高鑽之而彌堅不堪哀且思敘
詩之一篇庶幾昔子夏起夫子之所言其辭曰 君諱
鳳字伯簫梁相之元子九江太守之長兄也世德襲爵
銀燹相璽帙遐祖之鴻軌拓前代之休蹤遐逸越而難
繼非羣愚之所頌仁義本於心慈孝著於性言不失黃
帝行不鐵矩度清潔暎爾塗而不滓恤憂矜厄施而不
記由近及遠靡不覆載故能闡令名而雲騰揚盛聲而

風布踐郡右職三貢獻計辟州式却忠以衛上漢安二
幸吳郡太守東海郭君以君有透馳之節自公之操幸
州一舉孝廉拜郎中除陳國新平長神化風靡惠以流
下靜而爲治匪煩匪擾乾乾日禋於此黔首功成事就
色斯高舉宰司委職位思賢以自輔玄懃守謙靈白駒
以遂陞卅陽有馘寇漫關四命君討理之試守故鄆長
蓋危亂有不讓又畏此之開罔關二而關牧爰止其師
旅涉若飛鷹鳩鏞若夫墟虛彊者綏以德弱者以仁撫
簡在上帝心功訓而特紀轡輿宰堂邑暮月而致道視

闕四 遂據丐卿尹中表之恩情兄弟與甥甥明楊與女蘭

性樂松之茂好聞君顯令名舉宗爲歡喜不悵奄忽終
藏形而匿景耕夫釋耒耜桑婦投鉤莒道阻而且長望
遠淚如雨茨馬循大路舉裳而涉洧悠悠歌黍離思黃
鳥集于楚幃幃之臨西送君於庫土嗟嗟悲且傷每食
不絕夫人篤舊好不以存亡改文平感渭陽悽愴益
以甚諸姑咸璧踊爰及君伯姊孝孫字元宰生不識考
妣追惟厥祖思蓬首斬纓杖世所不能爲流稱於鄉黨
見吾若君存剥裂而不已壹別會無期相去三千里絕

翰未忼慨泣下不可止

洪适隸釋云右費鳳別碑刻舅家中孫甘陵石劬詩一篇其辭云瞻彼碑誄懷之好音謂卜君所作也其詩先敘世系歷官繼以韻語六十句其三句六言餘皆五言石君蓋鳳之中表也所述兄弟甥舅諸姑伯姊夫人孝孫悲傷哀痛之意宛轉淒切費氏父子三碑今並列於吳興校官之壁不知者指此爲碑陰趙氏亦有斯誤其中湔而不泮蓋用湔而不緇鵠若飛鷹鵠號若夫號虎蓋用號彼飛隼闕如號虎其字有

不同若非假借則是傳授異也

張按此碑亦載掌故但字畫多異故錄之

并錄

洪跋

梁相費汎碑文

費 珣

梁相諱汎字仲慮毗邦之人也其先季文爲魯大夫有功封費曰姬爲姓秦項兵起避墜于此遂留家焉世業稼穡好學禮樂大漢之關官司相繼絕而復續至梁府君以孝友全行聞於鄉邑仕更郡右塞鄴膺直在公廡法察孝廉除郎中主騎司馬遷蕭令氓民如子先教後罰玄默之化奉以忠信守以敦篤在位九年百姓移風

苛慝不作姦寇不發變爭路銷推讓道生三率不斷獄
禎祚感應時沛有蝗獨不入界由此顯名國以狀聞朝
廷嘉諸拜梁相宣慈惠闕不帥自正當登台階延究曷
者被病遜位春秋八十卒二子纂闕鳳由宰府至堂邑
令政九江太守遼孫玃感奚斯之義刊銘玄石旌勒厥
美俾闕覽焉其辭曰赫赫顯祖厥德懿鑠播勛於前
碩基業遺愛於民福流後牀闕昌闕在堂闕室功烈
休矣末昆勦力

洪适隸釋云右漢故梁相費府君之碑篆額今在湖

州費君名汎堂邑令鳳九江太守政之父也鳳以威
宗熹平中奉碑載費君二子所終之官此蓋其孫玠
所立故其銘有穆穆顯祖之句鳳碑云孝孫字元宰
生不識考妣追惟厥祖恩蓬首斬衰杖則鳳之子已
蚤卒此所謂玠乃九江之子得鳳畝一金之產者左
傳魯僖公賜季友汶陽之田及費碑作季文誤也

曆議

施延

太初過天日一度弦望失正月以晦見西方食不與天
相應元和改從四分四分雖密於太初復不正皆不可

用甲寅元與天相應合圖讖可施行

吳

分吳卅陽爲吳興郡詔

孫皓

古者分土建國所以褒賞賢能廣樹藩屏秦毀五等爲三十六郡漢室初興闔立乃至百王因事制宜蓋無常數也今吳郡楊羨永安餘杭臨水及丹楊故鄣安吉原鄉於潛諸縣地勢水流之便悉注烏程旣宜一郡以鎮山越且以藩衛明陵奉承大祭不亦可乎其臨分此九縣爲吳興郡治烏程

賜孟仁姚信手詔

孫皓

先是權太子和徙故鄣和子皓卽位追謚曰文皇帝
改葬烏程號明陵置園邑又分吳郡九縣爲吳興郡
命太守四時奉祠有司奏宜立廟京邑寶鼎二年七
月遣丞相孟仁太常姚信以靈輿法駕東迎神於明
陵比仁還中使手詔

使相繼奉問神靈起居動止

上孫權征柁中疏

朱然

嘉和九年朱然征柁中魏將李興等聞然深入率步
騎六千斷然後道然夜出逆之軍以勝反先是歸義

馬茂懷姦覺誅權深忿之然臨行上疏

馬茂小子敢負恩養臣今奉天威事蒙克捷欲令所獲震耀遠近方舟塞江使足可觀以解上下之忿惟陛下識臣先言責臣後效

與奮威將軍諸葛融書

朱 績

績襲父業拜平魏將軍樂鄉督魏征南將軍王昶率衆攻江陵城不克而退績與融書約追之融荅許績績便引兵及昶於紀南去城三十里績先戰勝而融不進績後失利權深嘉績盛責怒融融兄恪大將軍

貴重故得不廢

昶遠來疲困馬無所食力屈而走此天助也今追之力
少可引兵相繼吾欲破之於前足下乘之於後豈一人
之功哉宜同斷金之義

召謝譚爲功曹敎

吾 粲

粲遷會稽太守召處士謝譚爲功曹譚以疾不詣粲

下敎

云
云

夫應龍以屈伸爲神鳳皇以嘉鳴爲貴何必隱形乎天
外潛鱗于重淵者哉

易解

姚信

文言曰

乾坤爲門戶文說乾坤六十二卦皆放焉

知終終之可與存義也

知終者可以知始終謂三也義者宜也知存知亡君子之宜矣

君子以經綸

經緯也時在屯難是天地經綸之日故君子法之順經綸艱難也

六二鳴謙貞吉

三體震爲善鳴並親承之故曰鳴謙得正處中故貞吉

願貞吉養正則吉也

以陽養陰動于下止于上各得其正則吉也

王假之尚大也

四體震王假大也四宜之五得其盛位謂之大

彖曰旅小亨

此本否卦三五交易去其本體故曰客旅

九二曳其輪貞吉

坎爲曳爲輪兩陰夾陽輪之象也二應于五而隔于四止而據初故曳其輪處中而行故曰貞吉

可久則賢人之德可大則賢人之業

賢人乾坤也言乾以日新爲德坤以富有爲業也

此所以成變化而行鬼神也

此天地之數五十有五分爲爻者故能成就乾坤之變化能知鬼神之所爲也

精義入神以致用也

陽稱精陰爲義入在初也陰在初深不可測故謂之神變爲姤復故曰致用也

君子知微知彰知柔知剛

此謂豫卦也二下交初故曰知微上交於三故曰知彰體坤處和故曰知柔與四同功故曰知剛

井德之地也

其養而不窮德居地也

履而泰然後安故受之以泰泰者通也

安上治民莫過於禮有禮然後泰泰然後安也

請旌張白妻陸氏表

姚信

臣聞唐虞之政舉善而敘旌德擢異三王所先是以忠臣烈士顯名國朝淑嬪貞女表迹家閭蓋所以闡崇化業廣殖清風使苟有令性幽明俱著苟懷懿姿士女同榮故王蠋建寒松之節而齊王表其里義姑立殊絕之操而魯侯高其門臣竊見故鬱林太守陸績女子鬱生少履貞特之行幼立匪石之節年始十三適同郡張白侍廟三月婦禮未卒白遭罹家禍遷歿異郡鬱生抗聲昭節義形于色冠蓋交橫誓而不許奉白姊妹險讎之

中蹈履水火志懷霜雪義心固于金石體信貫于神明
送終以禮邦士慕則臣聞昭德以行顯行以爵苟非名
爵則勸善不嚴故士之有誅魯人忘其勇杞婦見晝齊
人哀其哭乞蒙聖朝斟酌前訓上聞天聰下垂坤厚褒
鬱生以義姑之號以厲兩髦之節則皇風穆暢士女改
視矣

誠于書

姚信

古人行善者非名之務非人之爲心自甘之以爲已度
嶮易不虧始終如一進合神莽退同人道故神明祐之

衆人尊之而聲名自顯榮祿自至其勢然也又有內折
外同吐實懷詐見賢則暫自新退去則縱所欲聞譽則
驚自飾見尤則棄善端凡失名位恒多怨人而害善怨
一人則衆人疾之害一善則衆人怨之雖欲陷人而進
已不可得也祇所以自毀耳願真僞不可掩褒貶不可
妄舍僞從實遺已察人可以不通矣舍已就人去否適泰
可以弘矣貴賤無常唯人所速苟善則匹夫之子可至
王公苟不善則王公之子反爲凡庶可不勉哉

士緯

姚信

信著士緯二卷所天論一卷余從群籍中寫出海內
有藏其全者余日望之

論清高之士上可如老子莊周下可如君平子貢耳若
於陵仲子及嚴遵夏甫子治未可盡以爲師矣平議之
士若季札趙武逮于林宗皆可盡爲則也其洩治伯宗
及本世史雲子將之屬皆美而未善也聖人考功黜陟
猶以三載而子將月旦之處史雲睚眦廢人其進者
或飾虛其急沮者皆離叛誠可謂妙矣然非沐浴
之風三千之弘化

延陵季子際會之間衛尉蔡君限之於弱余不以然季子以通妙達道之機假其討光恐增禍亂受光之讓非其本志若季子之爲君也欲行王道其與周爭治霸術以力與列國爭強則不肯破強楚而并其封疆也國人疾光而心歸季子季子不立社稷將傾恐光內灼而異圖外生非常之變將加于高人是以季子相時慮事順以安民而謂其弱未聞厥旨蔡子荅曰諸兄以賢讓國與之異能揚文武之遺教崇仁義之教化以移風易俗耳何必當與周事乎而苟守一節退耕於野使還

國無討賊之意反云國家有主社稷有祀乃吾君也蓋開篡殺之路非所謂從忠教也

楊子雲有深才潛知屈伸沉浮從容玄默近于柳下惠朝隱之風智似蘧瑗而高不及也班固稱之有大度不孜孜於富貴不戚戚於貧賤二者之美蓋亦良矣然楊子之書清貴甚遠無廟堂之議對王公大人之辭故令其骨鯁不見節操不顯也夫孟子之書將門人所記非自作也故其志行多見非惟教辭而已或拒萬鍾之祿或辭兼金之贈或以周漢禮殊二子時異不可責之於

周或曰帝納異言而子雲無正論卒有投閣之異孟軻
昂昂其肯然子雲保家養智之士孟軻鳳峙高世之英
也

周勃之勲不如霍光此前史所載較然可見而以勃功
大於光意竊不安何者勃本高帝大臣官尊勢顯衆所
歸向居太尉位擁兵百萬既有陳平王陵之力又有朱
虛諸王之援酈寄游說以譎諸呂因衆之心易以濟事
若霍光者以倉卒之際受寄託之任輔弼幼主天下晏
然遇燕王上官之亂誅除凶逆以靖王室廢昌邑立宣

帝任漢家之重隆中興之祚叅聲伊周爲漢賢相推驗
事效優劣明矣

汝南陳仲舉體氣高烈有王臣之節潁川李元禮忠壯
正直有社稷之能海內論二士有義而未決陳留蔡伯
喈云仲舉強於犯上元禮長於接下犯上爲難接下爲
易仲舉爲先元禮後矣天下於是爲定愚思竊以伯喈
未必可從也夫臯繇戒舜犯上之徵也舜治百揆接之
効也故陳平謂王陵言面折廷爭我不如公至安劉氏
公不如我而犯上則爲優是王陵當於良平朱雲殊乎

吳鄧矣

此御覽所載余按劉孝標世說注引語微不同第云海內論之未決蔡伯喈抑一言以變之疑

論乃定也

蓋葬于寬平則恐後世都邑居之葬于陵野則恐民人耕稼及之厚棺大槨人所爲用材木民人率多發掘以善其居千墳萬壙無不毀者其惟瓦棺薄葬歟以時服衣以高丘徹於深窆庶乎可以不辱耳

聖人所稟于四時也所稟于元氣也高不可極深不可測窮神知化獨見先識仁若春陽信若影響此所以稟於天也

神州何以專生聖人聖人曾不產於絕域乎推此論之
明神州者處乾坤之正鍾日月之精地形爽塏源流清
暢其生民也長短應數儀狀端正音聲得節性理調良
孟軻驅世士於仁義之域行者步中正之途

銅俱出於石爲鈴則小鑄鐘則大絲俱生於蠶爲繒則
賤爲錦則貴

馬援馮几而見梁竇子弟文舉坐榻而受徐文高拜

昕天論

昕讀若軒

姚信

人爲靈蟲形最似天今人顧前多臨胸而項不能覆背

近取諸身故知天之體南低入地北則偏高又冬至極低而天運近南故日去人遠而斗去人近北天氣至故冰寒也夏至極起而天運近北故斗去人遠日去人近南天氣至故蒸熱也極之立時日行地中淺故夜短天去地高故晝長也極之低時日行地中深故夜長天去地下淺故晝短也

徐詳傳評

陳壽

侍儀徐詳胡綜皆孫權之時幹興事業者也儀清格正素徐數通使命綜文采才用各見信任譬之廣廈其榱

卷之五

卷之五

六

椽之侏乎

晉

薦賀循表

陸機

伏見吳興武康令賀循德量遽茂才鑒清遠服膺道素
風操凝峻歷踐三城刑政肅穆守職下縣編名凡萃出
自新邦朝無知己恪居遐外志不自營年時倏忽而邈
無階緒實州黨愚智所爲悵然臣等並以凡才累授飾
進被服恩澤忝豫朝末知良士後時而守局無言懼有
蔽賢之咎是以不勝愚管謹冒死表聞

浮玉山鱉魚讚

郭璞

陽鑒動日土蛇致宵微哉鯢魚食則不驕物在所感其
用無標

與支遁書

謝安

遁還吳立支山寺欲入剡安爲吳興守與遁書

思君日積計辰傾遲知欲還剡自治甚以悵然人生如
寄耳頃風流得意之事殆爲都盡終日戚戚觸事惆悵
惟遲君來以晤言消之一日當千載耳此多山縣閑靜
差可養疾事不異剡而醫藥不同必思此緣副其積想
也

異姓爲後議

吳商

或問以異姓爲後然當還復本親及其子當又從其父而服耶將以異姓而不服也荅曰神不歆非族明非異姓所應祭也頃世人無後並取異姓以自繼然本親之服骨血之恩無絕道也異姓之義可同于女子出適服還本親皆降一等至於其子應從服者亦當同于女子之子從於母而服其外親今出爲異姓作後其子亦當從于父母服之也父爲所生父母周子宜如外祖父母之加也其昆弟之子父雖服之大功於子尤無尊可加

及其姊妹爲父小功則子皆宜從于異姓之服不得過
總麻也

禋祀六宗議

吳 商

禋之言煙也三祭皆積柴而實牲體焉以升煙而報陽
非祭宗廟之名也鄭所以不從諸儒之說者將欲據周
禮禋祀皆天神也日月星辰司中司命風師雨師凡八
而日月并從郊故其餘爲六宗也以書禋於六宗與周
禮事相符故據以爲說也且文昌雖有大體而星名異
其不同故隨事祭之而言文昌七星不得偏祭其第

四第五此爲周禮復不知文昌之體而又妄引爲司中司命箕畢二星既不係於辰且同是隨事而祭之例又無嫌於所係者范甯注虞書曰考觀衆議各有說難鄭氏證據最詳是以附之案六經衆議未知孰是虞喜別論云地有五色太社象之總五爲一則成六六爲地數推按經句闕無地祭則祭地

鵝賦序

沈 充

先大夫俞潁川者殊精意于養鵝求得奇鷺時有綠眼黃喙焦叔明以太康中得大蒼鵝從喙至足四尺有九

寸體色豐麗鳴聲驚人三年而爲暴犬所害惜其不終
故爲之賦云

吳興三帖

王羲之

隔以久諸懷旣不可言且今多慘戚遲君果前暫得一
散懷知以多疾不果乃當秋事省告同此歎恨如何可
言葬事不可倉卒當在九月初過此故欲一與吳興集
冀無不尅耳然事來萬端不知如人意不非書能悉君
數告以慰之耳

六月十六日羲之頓首秋節垂至痛悼傷惻無情切割

奈何奈何此雨過得十日告知君如常吳興轉勝甚慰
想得此涼日佳患散乃委頓耿耿且以佳興消息僕故
是常耳勞勞解日力不次王羲之頓首

墳墓在臨川行欲改就吳中終是所歸中軍往以還田
一頃烏澤田二頃吳興想弟可還以與吾故示想弟居
意故如往言忠終高也是以思同之

吳興鮒帖

王羲之

今付北方脯二夾吳興鮒二籠蒜條四千二百

又一帖云今付

吳興鮒

二籠

源書帖

王羲之

源遂差云尙未恭命終之何聞真長知吳興想必娒
意南道差否

此真長卽劉惔耶惔傳云與羲之雅相友善而不載

知吳興當是偶逸耳

元衢

吳興帖

王獻之

吾十一日發吳興違遠兄姊感戀無喻慶等別不可言
比奉告故多患姊經感極頓憂馳益深適諮議十六日
告風疾故尔及側餘可行未東動靜不寧吾

一作宜速

吳與丞別兄進猶戀罔勞亦劇惡馳情二女晚生皆佳
未復華姜疏比來得直疏故惡故足當視華也汝兒女
並可不

薦沈勁疏

王胡之

沈勁年三十餘以刑家不得仕進郡將王胡之深異
之及遷平北將軍司州刺史將鎮洛陽上疏曰

臣當藩衛山陵式遏戎狄雖義督羣心人思自奮然方
剪荆棘奉宣國恩艱難急病非才不濟吳興男子沈勁
清操著於鄉邦貞固足以幹事且臣今西文武義故吳

興人最多若令勁叅臣府事見者旣悅義附亦衆勁父克昔雖得罪先朝然其門戶累蒙曠蕩不審可特垂沛然許臣所上否

公孫夫人贊

併序

鈕酒母孫 瓊

夫人姓公孫氏會稽剡人也資三靈之淳懿誕華宗之澄粹奇朗昭於鄙訛四教成于弱笄慈惠溫恭行有秋霜之潔祇心制節性同青春之和敦悅憲章動遵禮規居室則道齊師氏有行則德配女儀禮服有盈籩豆無

闕

翁歟夫人天資特挺行高冰潔操與霜整性揚蘭芳德
振玉頌翁彼瓊林奇翰有集展彼碩媛舍德來綺勸與
禮遊靜以義立

與虞定夫人薦環夫人書

虞潭母孫氏拜武昌侯
太夫人謚定夫人孫皓

族孫
女

孫環

瓊聞興賢崇德聖王令典旌善表操有邦盛務伏見族
祖吳國人民富春孫彥妻環少厲令節服膺道教逮適
孫氏恪居婦職宗姻有聲奉禮未周彥母喪殯喪殯半
年彥奄亡沒環率禮奉終抗義明節傾竭私產以供葬

送禮服既終前無立子家欲改醮誓而不許

荅虞吳國書

即定夫人

孫瓊

咸和中避蘇峻亂於臨安山吳國遣使餉饋荅書

此果有胡桃飛穰飛穰出自南州胡桃本生西羌外剛
樸肉柔甘質似古人欲以奉貢

與從弟孝徵書

孫瓊

昔爾譏我以養鵠乃戒以衛懿滅懿之禍斯言惑矣吾
未之取彼衛懿之好民無役車之載鶴有乘軒之飾禍
敗之由由乎失所若乃開園匹於靈囿沃池矩平神沼

文魚躍於白水素鳥翔乎神州豈非周文之德大雅所
修哉夫嘉肴旨酒非不美也夏禹盛於陶豆殷紂賄以
玉杯而此聖以興彼愚以滅蓋器之失所如其無失來
難可施乎

與沈警書

王恭

恭以前將軍鎮京口與警有舊好復引爲參軍手書
殷勤苦相招致尋復謝職子穆夫少好學恭命爲前
軍主簿與警書穆夫字彥和爲賊孫恩所用敗歿警
亦坐誅

足下既執不拔之志高臥東南故屈賢子共事非以吏職嬰之也

論會稽王道子疏

閻人爽

驃騎諮參軍茹千秋協附宰相起自微賤竊弄威權銜賣天官其子壽齡爲樂安令賊私狼籍畏法奔逝竟無罪罰傲然還縣又昆婁類傾動亂時穀賤人饑流饑不絕縣百姓單貧役調深刻又振武將軍庾桓鳴角京邑王簿戴良夫苦諫被囚殆至亡命而桓以醉酒兄怒良夫以執忠廢棄又權寵之臣各開小府施置吏佐無

益於官有損於國

東海王後議

沈寂

東晉孝武帝太元六年詔曰亡大兄以司馬珣之爲國後祭祀何儀博士沈寂等議

禮大夫三廟無貴賤之別然則上至皇子下及陪臣其禮無二會稽王嗣子旣以疾廢當降從之公子則皆如大夫牲用少牢皇子依如大夫禮應立後宜先告權爲行廟告于禮無文宜先行廟告嗣而後迎繼嗣之身紫禮君薨嗣子生太祝禪冕告于廟旣葬嗣子生祝告于

廟明夫宗廟者神靈之所宅是以存亡吉凶必先告于
廟古今不革之制三代不易之典豈有興滅繼絕傳祀
百代而誣亡者之靈滅告生之義耶緣情依禮謂宜先
告于靈後迎於子

燈讚

支曇諦

既明遠理亦弘近教千燈同輝百枝並曜飛煙清夜流
光洞照見形悅影悟旨測妙

道士支曇諦誄

并序

丘道護

晉義熙七年五月某日道士支曇諦卒春秋六十有五

嗚呼哀哉法師肇胤西域本出康居因族以國氏旣伏
膺師訓乃從法姓支徙于吳興郡烏程縣都鄉千秋里
資金商之貞氣藉陽育之韶律曹遐方而誕秀協川岳
而稟神識情湛粹風宇明肅道致表於天期德範彰於
素麗貞悟獨拔羣異不足以動其心至誠深固衆論莫
能以干其執是以超塵絕詣慧旨發于弱齡研微耽玄
明道昭於歲暮故能振靈風于神境演妙化于季葉嗣
清徽於前哲穆道俗而歸懷焉游涉衆方敷揚大業妙
尋幽蹟清言析微加善屬文辭識賞衆流固已諧稗風

勝願冠一時矣公之中年爰乃慨以城傍難置幽居爲
節且山水之性素好自然靜外之默體自天心於是謝
緣人封遁迹巖壑乃考室于吳興郡故鄣之崑山味道
崇化二十餘載其棲業所弘可以洗心滌垢空象之矣
是以窮興永年於是晡宗歸仁者自羣方而集欽風懷
趣者不遠而叩津焉於時時望英豪多延請齋講公虛
心應物不嘗以動止介懷推誠述義未始以道俗殊致
其中抱一之德又遐邇所推方將灑拂玄路緼維頽風
超外玅梯擬徹玄蹤惜乎不永遘疾而終識者深云亡

之痛攸情感惟良之悲蓋無爵而貴生榮死哀者其此
之謂矣雖至理冥一存亾定於形初玄識妙照骸體同
於朽壤然而關情期於欣感之境未泯乎離會之心者
亦何能不以失得爲悲喜臨長岐而悽懷哉苟冥廢之
難體寄筌翰以懷風援弱毫而舒情播清輝乎無窮乃
作誄曰

綿綿終古曖曖玄路妙緣莫叩長寐靡寤生滅紛紜動
息舛互相驅百世季葉彌蠹水溺塵勞孰知其故至人
乘運靈覺中肇未覩滄流并龜無小大明融朗幽夜乃

曉滅有歸空除闇卽嗽道洽無方仁被禽鳥昧者靡遺

識者彌了其一超哉法師道性自然一心絕俗祇誠重玄

研微神鋒妙悟無間塵之所著在至斯捐累之所引秉

之彌堅擺落塵羈振花靈淵其二遶遶清雅蕭蕭貞韻汪

汪其冲疊疊其進和而有慨異而不峻淳心獨得標想

千似虛以應物無來不順其三汎遊弘化振響揚暉開道

玄肆肇闢靈扉位制冥極剖析幽微忘懷善挹穆然靡

違會通羣方總之所歸遐抗頽綱闡固法闡緒此妙慧

乃播神威其四幽境湛默人肆誼引閑邃易一華紛難泯

公乃慨然中駕潛軫卜居川巖構室林巘擯拭外緣潛
精內敏靡罔不服無微不盡

其五

蔚矣崑嶺崗阜丘墟連

峯雲秀廻壑迂餘庭陰蕭條階繞清渠翳然其遠肅介

其虛眇眇玄風愔愔僧徒昧道閑室寂焉神居心隨道

親情與俗踈

其六

道固無孤德必有隣淵清引映業勝懷

人睎風宗玄自遠來賓亦有襟期時來問津湛湛先窮

日日王神林壤有謝道心常新

其七

聖逝言絕賢喪義垂

翳翳末運玄化將頽澹矣夫子道俗歸懷庶享遐年振

此落維如何不弔素世永辭儀景長歸逝矣不追有識

深慟含情同悲鳴呼哀哉

其八

推著綢繆聚淹信宿閑宴

清宇藉卉幽谷或濯素瀨爰憇翠竹屢興名辰汎觴掇

菊梨柚薦甘蒲筍爲藪賦詩詠言怡然偕足眷懷茲遊

想之在目傷哉斯遇千載無復踐舊霑襟瞻憤悲哭鳴

呼哀哉

其九

有必之無始則歸卒達人妙觀千齡一日昧

者或應橫爲凶吉邈矣法師夙反玄室累劫之勤不速

而疾庶邁冥緣終會靈術妙斤弗運實深喪質情在未

冥悵焉自失寄懷毫素徽風載述嗚呼哀哉

其十

舉潘綜吳達孝廉教

王韶之

潘綜鄉人秘書監丘繼祖廷尉沈赤黔以綜異行舉
補左民令史除遂昌長歲滿還家太守王韶之臨郡
發教曰

前被符孝廉之選必審其人雖四科難該文質寡備必
能孝義邁俗拔萃著聞者便足以顯應明敷允將符旨
烏程潘綜守死孝道全親濟難烏程吳達義行純至死
墳成行咸精誠內淳休聲外著可並察孝廉

請賑疏

陶 四

當今天下不普荒儉唯獨東土穀價偏貴便相鬻賣聲

必遠流北賊聞此將窺疆場如愚臣意不如開倉廩以賑之